



11. august 2026

EM2026/292

Inatsisartut Suleriaasianni § 33 naapertorlugu aalajangiiffigisassatut siunnersuut matumuuna saqqummiuppara:

**Kalaallit Nunaanni Inuit Pisinnaatitaaffii pillugit Siunnersuisoqatigiit pillugit Inatsisartut inatsisaata allanngortinneqarnissaanut siunnersuummik Naalakkersuisut saqqummiussinissaannik Inatsisartut aalajangiiffigisassaattut siunnersuut, taamaalilluni Kalaallit Nunaanni Inuit Pisinnaatitaaffii pillugit Siunnersuisoqatigiinni ilaasortaasarneq innuttaasunik sullissinermut atatillugu pisortatigoortumik suliaqarnissamut (borgerligt ombud) maleruagassatigut ilaatinneqalerniassammat. Inatsisissatut siunnersuut kingusinnerpaamik UPA 2027-mi saqqummiunneqassaaq.**

Inatsisartunut ilaasortaq, Nivi Rosing, Inuit Ataqatigiit

### Tunngavilersuut

Inuit pisinnaatitaaffiinik ataqqinninneq inuiaqatigiit tamat oqartussaaneq toqqammavigalugu tunngaviummik tunngavigaat. Kalaallit Nunaanni Inuit Pisinnaatitaaffii pillugit Siunnersuisoqatigiit Kalaallit Nunaanni inuit pisinnaatitaaffiinik siuarsaallutillu illersuineri pingaarutilimmik inissisimapput kiisalu Inatsisartunut Naalakkersuisunullu aamma inuit pisinnaatitaaffii pillugit apeqqutini siunnersuisarlutik

Siunnersuisoqatigiit misissueqqissaarnernik, nalunaarusianik innersuussutinillu sammisat pingaarutilit arlallit pillugit suliaqartarput, ilaatigut nunap inoqqaavisa pisinnaatitaaffii, naligiissitaaneq, innarluutillit pisinnaatitaaffii kiisalu inuit pisinnaatitaaffiinnut tunngasut allat pillugit.

Taakkua saniatigut Siunnersuisoqatigiit Kalaallit Nunaat nunami namminerimmi nunanilu tamalaani sinniisuuffigisarpaat aammalu Kalaallit Nunaanni inuit pisinnaatitaaffiinik suliaqarnerup takuneqarsinnaanerulersinnissaanut peqataasarlutik.

Siunnersuisoqatigiinni ilaasortat suliaqat taakku nalinginnaasumik suliffeqarnertik saniatugut ingerlattarpaat. Suliaq annertusinnaavoq, akisussaaftimmik annertuumillu tigummiaqarfiulluni kiisalu ataatsimiinnerni, isumasioqatigiinnerni nunanilu tamalaani ingerlatanut peqataaffiulluni.

Inuit Ataqatigiit isumaqarput inuiaqatigiinnut pingaarutilimmik suliaq tamanna inatsisitigut sinaakkuteqartinneqarluni ataqqineqartariaqartoq, taamaalilluni Kalaallit Nunaanni Inuit Pisinnaatitaaffii pillugit Siunnersuisoqatigiinni ilaasortaasarneq innuttaasunik sullissinermut atatillugu pisortatigoortumik suliaqarnermut (borgerligt ombud) naligiissinneqassalluni. Aaqquussineq taamaattoq ilaasortat suliaqarnissaminnik pitsaaneruseqarsumik isumagininnissaannut tapersersuissaaq aammalu Inatsisartut inuit pisinnaatitaaffii pillugit sulineri qanoq pingaaruteqartitsinerannik ersarissumik takutitsissalluni.

Siunnersuutip siunertarinngilaa Siunnersuisoqatigiit attuumassuteqanngitsumik inissisimanerisa imaluunniit suliaasaasa allanngortinnissaat, kisiannili ilaasortat sulinnissaannut atugassarititaasut pitsanngorsarnissaat kisiat siunertarineqarpoq.

# INUIT ATAQATIGIIT

## Inatsisartuni



Tamanna tunngavigalugu aalajangiiffigisassatut siunnersuut manna saqqummiunneqarpoq.

### **Pisortanut aningaasatigut allaffissornikkullu kingunerisassat**

Siunnersuut akuerineqassappat naatsorsuutigineqarpoq aningaasatigut allaffissornikkullu kingunerisassat inatsisissatut siunnersuutip suliarineqarneranut AC-mi ukiup affaanut naatsorsorneqarsinnaasumik sulisussanik pisariaqartitsissasut. Innuttaasunik sullissinermut atatillugu pisortatigoortumik suliaqarnermut (borgerligt ombud) aqqissuussinermut aningaasatigut kingunerisassat allat inatsisissatut siunnersuutip suliarineqarnerani erseqqinnerusumik qulaajarneqassapput.

### **Namminersorlutik inuussutissarsiortunut aningaasatigut allaffissornikkullu kingunerisassat**

Siunnersuut namminersorlutik inuussutissarsiortunut toqqaannartumik aningaasatigut imaluunniit allaffissornikkut kinguneqassanngilaq. Sulisitsisunut ilaasortat ilaasortatut suliaasanik ingerlatsinerat pissutigalugu kingunerisassat inatsisissatut siunnersuutip qanoq ilusilernerneqarnissaanik apeqqutaassapput.

### **Innuttaasunut aningaasatigut allaffissornikkullu kingunerisassat**

Siunnersuut innuttaasunut toqqaannartumik aningaasatigut imaluunniit allaffissornikkut kinguneqassanngilaq.